

Vergadering streektaolambassadeurs

11 april 2022, 19.30 uur in Beilen

Anwezig: Roel Barkhof, Renate Snoeiijing, Ans Klok, Jan Hartlief, Henk van Tellingen, Bertus Mos, Geert Woldman, Aaltje Leusink, Arja Olthof

Lösdoen

Renate het iederiene welkom. Mooi daw mekaar weer zien en spreken kunt in Beilen en dat er alweer zoveule gebeurt in de gemeentes.

Veurstellen neie veurzitter

Roel Barkhof vertelt kört over waar hij vurtkomp en wat hij edaone hef en nog altied dut.

Roel komp uut Emmen, hef warkt as journalist in Grunning en Drenthe. Bij radio Drenthe dee hij veul veur economie en politiek. Hij stun an de wieg van TV Drenthe, hef ehölpen dit in de bienen te kriegen. Sinds 1998 is e zölfstandig communicatieadviseur. In zien wark hef de streektaal altied as verbindende factor een rol espeuld.

Rondtie langs de velden

Ans Klok – Westerveld

Weekend van 9 en 10 april was der Rondje Cultuur in Dwingel, veur 55 man een Drents dictee egeven, veurlezen kun nou niet, misschien in mei.

Taal an Taofel, op 27 meert in Dwingel, was een succes mit 72 bezukers. Deur corona mus het verzet worden, gelukkig leup de organisatie strak en hebt de vrijwilligers nao een gigantische belronde haost al het volk kunnen anmelden veur 27 meert.

Ans hef 17 vrijwilligers die hölpt bij het organiseren en uitvoeren van activiteiten. De groep vrijwilligers bint er wel gauw weer bij nao de coronatied en wilt geern weer wat doen. Der bint er nou ok weer een paar bij die weer een cursus evolgd hebt bij Ans.

Ans hef dit seizoen een Drenthecursus en een spellingcursus egeven, beide mit een enthousiaste groep deelnemers.

Jan Hartlief – Aa en Hunze

Jan hef een groep van 8 vrijwilligers. Janny Bruins, gedreven streektaalvrijwilligster, dut een hiele bulte in Aa en Hunze. Ze koomt een keer of zes bij mekaar in 't jaor. Der is goed contact mit de gemeente

Jan gef nou cursus an de volksuniversiteit in Zuudlaoren (Drenthecursus), het is een klein groepie (eigenlijk té klein). In Grolloo is ok interesse veur een Drenthecursus, net as in Zuudlaoren. Die wilt volgend jaor graag weer.

Der is een Streektaolstried op Nieveen ewest, op 25 meert. Der waren 19 teams (85 man). Gemiddeld hebt de speulers umdebij de helfte goed, bint de vraogen misschien te moeilijk? Nee, der mut ok uitdaging in zitten en het is ok mooi as ze der wat van leert en wat heurt wat ze nog niet wussen.

Jan wil nog wel es wat plaatsjen in De Schakel, mar as ze in het Drents anlevert wordt het hooguit in het Nederlands eplaatst. As ze het in het Drents derin hebben wilt mut er betaald worden. Jan gef de name van zien contact deur an Renate, die hef daor nog misschien contacten.

Het veurlezen kun deurgaon dit jaor in Aa en Hunze en der waren genug vrijwilligers um veur te lezen. Der bint umdebij 50 veurlezers in Aa en Hunze. Ok op de peuterspeelzalen is veurelezen.

Ankomen vrijdag, 16 april, is der markt in Baal. Veurige markt was niet zo'n succes, meinsen viendt dingen wel mooi mar bint niet bereid um het bedrag der veur neer te leggen.

Henk van Tellingen – Coevern

Henk hef 7 vrijwilligers, de meesten in en um Slien.

Der waren plannen um in de Nacht van de Nacht (van winter- naor zomertied) een activiteit bij het Openluchtmuseum te organiseren, mar deur corona duurden ze het niet an dingen vaste te leggen. Schöf nou deur naor oktober. Hoe aj dat organiseren moet is nog een vraog, daor bint veul vrijwilligers bij neudig. Ans hef hier in Dwingel ervaoring mit, misschien kuj zo van mekaar leren?

Elk jaor streektalstried in Slien.

De vrijwilligers hebt toe-ezegd um de wandelroute in de gemeente Coevern (culturele gemeente) te prissenteren. Daor gaot ze staon mit een kraam van het Huus.

Fair Schonnerd komp nog.

Der is nog niet veurelezen, de vrijwilligers duurden dat nog niet an. Reacties van schoelen op de Wiesneus waren wisselnd. Aj allent de deuzen mit tidschriften langes brengt weej niet wat er mit gebeurd en of de tidschriften ok echt gebruikt/verspreid wordt.

Neie burgemeester hef in oktober een broescursus ekregen, Renate en Henk hebt dat mit mekaar edaone. Op 12 mei hef Henk nog weer een gesprek mit de burgemeester over Drents in de raad.

Henk hef een Drenthecursus egeven in Börk, een gevarieerde groep. De certificaten mut nog vanneis eschreven wordt (+1 veur de hond die nou ok Dreints kan).

Veur het kraantie van Schonnerd schriefft Henk en zien vrijwilligers regelmaotig wat.

Bertus Mos – De Wolden

Ok De Wolden hef een neie burgemeester, Renate en Bertus hebt heur digitale broescursus egeven. Daor was ze wies mit.

Albert Haar hef in de gemeenteraodsvergadering een pleidooi eheulden veur het gebruik van Drents in de raad en het gemeentehuus. Der is een motie over an-eneumen, nou mut er een plan veur komen. Bertus hef al deurverwezen naor het Huus van de Taol, tot nou toe is der nog gien hölp evraogd deur de gemeente. Het pleidooi van Albert stiet op film, Renate stuurt dit deur zo gauw ze dat hef.

Bertus wes op het Convenant uut 2018: zörg dat dit onder de neus van de raodsleden en burgemeesters komp, ze hebt er lang niet allemaole weet van dat het bestiet en wat er in stiet. Het blef zaak hier iedere keer weer vanneis aandacht veur te vraogen. Tot nou toe gebeurt er, nao het ondertieken van het papier, nog niet zoveule in de provincie en gemeenten.

Hef een leuke Drenthecursus in Rune egeven, ok in Runerwold was een Drenthecursus. Mit mekaar of-esleuten in de Karstenhoeve.

Bertus was nog uut-eneudigd veur een middag bij de oldernsoos in Pesse.

Schref columns in de Wolder/Westervelder Courant, um en um mit Ans Klok.

Bertus zit vanaovend veur het lest an taofel hier, hij stopt mit zien vrijwilligerswark veur het Huus. Het is mooi ewest, Bertus hef zich meer as twintig jaor drok emeuken veur het Drents. Bedankt veur dizze lange staat van dienst, uut naam van oons allemaole!

Geert Woldman – Midden-Drenthe

Geert en zien vrijwilligers hebt ok dit jaor weer een succesvolle streektaolstried in Börk mit zowat 80 man verdeeld over 18/19 ploegen organiseerd. Renate hef der bij ewest, de sfeer zat er goed in.

Het veurlezen kun deurgaon in Midden-Drenthe. Naost 16 schoelen ok peuterspeelzalen bezöcht. In de meivekaansie leest er nog vrijwilligers voor op 4 BSO-locaties van Kits Primair.

Renate hef de meertmaond op het gemeentehuus lös edaone. Op het intranet kriegt de ambtenaren in meert elke dag een vraog. Reacties bint vake positief.

Het Huus van de Taol hef een vertaling emeuken van de omgevingsvisie (samenvatting) veur de gemeenteraad. Conclusie: hoe dudelijk communicere wij as gemeente, hoe leesbaar bint de stukken veur Jan mit de pet?

De column in de kraant van Midden-Drenthe verzörgt de vrijwilligers bij roulatie.

Neie initiatieven:

- veurlezen in bejaordenhuzen
- lopen met wielen: een wandeling (um de week) mit rollator/rolstoel/scootmobiel waor de vrijwilligers ok heur bijdrage an levert.

Geert hef probeerd um Dreints in de openbare ruimte op de agenda bij de dorpsbelangengroepen te kriegen, bijveurbeeld veur Drentstaolige plaotsnaamborden, tot nou toe zonder succes. Goed um daar samen mit Renate of het bestuur es naor te kieken, wie muj hebben um wél een ingang te kriegen?

Aaltje Leusink – Börger-Oring

Aaltje kwaamp nét veur corona as streektaolambassadeur bij de club. Het opstarten valt heur niet mit. Ze hef nou 4 vrijwilligers. Der bint wel genog veurlezers.

Der is een overleg mit de burgemeester en een beleidsambtenaar van cultuur ewest.

Der was een initiatief veur een standbeeld veur Johanna Bergmans-Beins, helaas giet het plan niet deur. Het plan was al zowat klaor, de vrijwilligers zulden allent veur de promotie mitdoen. Daar hebt ze, in overleg mit Renate, veur bedankt.

Aaltje hef wel ok een neie vrijwilliger derbij die aordig thuus is in het maken van pubquizen en escape rooms, ok digitaal. Een mooie anwinst!

Der is niet veur-elezen, umdat er geluden kwamen dat er onder de kiender veul besmettings waren. Schoelen waren terugholdend, daorumme niet langs egaone. Verstandig.

De lesbrief bij de Wiesneus en wiesneus.nl bint niet bekend genug.

De groep 'Gribbelgrab' hef anebeuden wel sketches te willen doen as de Aaltje en heur vrijwilligers wat organiseert.

Stukkies kunt ze kwiet in Week In Week Uit.

Willy Weerman hef een jeugd-bongel emeuken. Naodeinken over wat we daormit kunt, mar daar mut een goed beslagen plan onder liggen.

Vrijwilligersmörge 21 mei

Oproep um an te melden naor de eigen vrijwilligers, want tot nou toe bint dat er nog niet zoveule. Anmelden kan digitaal op <https://www.huusvandetaol.nl/21mei/>

Renate vertelt kort wat het programma wordt: terugblik, veuruutkieken, de neie vrijwilliger, meziek en natuurlijk soep en kroketten as ofsluter.

Wi'j veur de eigen gemeente es ien ding vermelden wat er in de ankomen tied nog organiseerd word?

Heksen en Blauwvarven

Arja dut uut de doeken wat dit project inholdt. Elke gemiente kan hier an mitdoen. De opzet van het plan zit in de bijlage, op 9 mei is der veur iederiene die mitdoen wil een veurlichtingsaovend in Beilen. Wi'j dat alvaste deurgeven an de vrijwilligers, samen mit de bijlage en begeleidend schrijven?

Veurlezen

In het rondtie langs de velden bint er al wat dingen over ezegd. Belangriek is dat Arja nog deurkreg an hoeveule kiender veurelezen is dit jaor. Dat zette wij altied in het jaorverslag en giet as verantwoording naor de gemeentes die subsidie geeft.

Rondvraag

- Streektaolstried antrekkelijker maken veur jongere deelnemers. Geert Woldman wil daar wel een poging tot waogen. Henk gef as tip um de sportverenigings te benadern, dan krieg der wel meer volk van umdebij virtig jaor bij.
- Der is veul animo veur de streektaolstried, hoe kuj zukswat opzetten? Veur de vraogenrondes kuj warken mit thema's: standbeelden, Dreintse woorden, spelling, ofkortings van verenigings, veurwarpen raoden, bekende Drenten, lokaal neis van het ofgelopen jaor, meziek, olde filmfragmenten, nei-Drents...

In Aa en Hunze kuj oe veurof opgeven, in Börk word de teams evraagd. Hoe aj deelnemers regelt, daar bi'j natuurlijk vrij in. Priezen kuj via het Huus regeln.

Bij museums kuj ok bijveurbeeld (foto's van) veurwarpen vraogen, of informeer **i**es bij een historische vereniging.

Rondvraag

Jan Hartlief en Geert Woldman wilt geern een deus mit boeken veur een bezuuk an de burgemeester.

Renate: van Ans en Bertus hef ze namen van supermarkten deurekregen veur de beurtbalkies, wi'j nog namen deurgeven zodaw deur kunt. Dizze week nog deurgeven, ok de supermarkten die veurig jaor al mitedaone hebt. As ze ok dit jaor balkies hebben wilt, geef de namen deur.

Dit jaor is der een vaste set mit zinnegies op de balkies.

Dichtdoen

Renate bedankt iederiene veur de aanwezigheid.

De volgende vergadering is op **dinsdag 21 juni, um 19.30 uur** in Beilen.